

18. “O Mala Mulimuli E 7”



O le Ata Tele

O le Faaaliga 11:18, e 3 Ootootoga o Mea Tetele o le a Tutupu i le Faai'uga o le Tusi o Faaaliga:

1. Ua Ita Nu:

O loo faamatala mai i le Faaaliga 12-14 le ita tele o nuu ma malo, ua omai faatasi ai le manu fe'ai mai le sami, le manu fe'ai mai le fanua, atoa ma la paaga, e tau le taua ma Le Atua Foafoa atoa ma Ona tagata. O le tali a Le Atua i lea tetee, o le auina mai lea o fe'au a agelu e toatolu. O fe'au nei e valaaulia ai le lalolagi ia toe

foi e ifo i Le Atua Foafoa, ma lapata'ia mai ia mataala e iai pule faa Papelonia.

2. Ua oo mai Lou Toasa:

Ua faatinoina lea i le liligiina ifo o le toasa le suia o Le Atua i luga o i latou uma o e sauaina Ona tagata. O le vaega tatou te suesueina o le toasa o Le Atua, ***O Mala Mulimuli e 7.***

3. Ua oo Mai le Taimi e Faamasinoina ai e ua Oti, ma Tauia Au Auauna le 'au Perofeta:

Tatou te suesueina atili lenei mataupu i le aga'i atu i le faai'uga o la tatou suesuega o le tusi o Faaaliga.

Ua oo mai le Taimi o Le Toasa o Le Atua.

O le tala i le laveaiina o Isaraelu mai Aikupito e maua ai e soo o Iesu le loto tele ma le toa'filemu.

O le Faaaliga 16, o liligiina ifo ai ipu mala e 7—pe o mala e 7—o le toasa o Le Atua, ia i latou ua latou teena le faamagaloga a Iesu, ma latou sauaina Ona soo. A o le'i taunuu lea tulaga, ae mua'i faaaliga mai i le Faaaliga 15 se vaaiga e faamallosia ai tagata o Le Atua o tutu i luga o le sami tioata. loo vaaia ai tagata manumalo o Le Atua o tutu mai i luga o le sami tioata. O i latou ia ua manumalo i le manu fe'ai ma lona faatagata. O loo latou faia tele se fiala ona o lo latou manumalo, ma latou usuina ai le Pese a Mose ma le Tamai Mamoe. E manino le faaagaina e Ioane o le tala mai le Feagaiga Tuai i le tafeaga mai Aikupito i le ta'ita'iga a Mose. Ina ua pasia e Isaraelu le Sami Ulaula, ona latou usuina lea o le pese o le vi'iga i Le Atua. Ua latou

manumalo e ui i le faamalumalu mai o faigata mata'utia ma le malolosi.

Ua tatou oo mai nei i le tasi foi lavea'iga. A o le taimi lenei o le lavea'iga mai au a Papelonía—a ua aga'i atu nei tagata o Le Atua i le Kanana i le lagi. O le a tatou vaaai foi nisi o gagana o mala na pa'uu i Aikupito, o loo faaaogaina i ata o le liligiina ifo o mala o le taimi o le i'uga.

Toe Tepa i Tua i Le Feau o Le Faamoemoe

O vaaiga uma o le Faaaliga, e amata lava i le fe'au o le faamoemoe.

Faaaliga 1, o loo vaaia ai Iesu e fealualua'i i le va o tuugalamepa e 7, o le faatusa o Ekalesia 7. E iai taimi e aoaiina ai se Ekalesia ona o lo latou vaogata. A e ui lava i lea, a e na vaaia i le faaaliga Iesu o fealualua'i i totonu o Lana Ekalesia.

O le Faaaliga 4, o loo vaaia ai le nofoalii o Le Atua ma Le Tamai Mamoe. Ona sosoo ai lea ma mala o le feagaiga e ala mai i ti'eti'e solofanua e 4. O mala nei e oo mai ia i e talitonu a ua tau mamao ma Le Atua ina ia faafoi mai ai i latou i le mafutaga vavalalata ma Le Atua.

Ona tatou oo mai ai lea i le liligiina mai o mala e 7. Ua faailoa mai e Le Atua e malutia Ona tagata i nei mala. O le a tutu i latou i luga o le sami tioata ma pepese i le pese o le manumalo.

O le Pese o Le Manumalo

E taua tele lenei pese i le tusi o Faaaliga. E fesoasoani le pese lenei e malamalama gofie ai la tatou vaai i le tulaga o le a oo iai tagata o Le Atua. O i latou o pepese, e pei o i latou o alalaga tapua'i i se taaaloga.

Tatou te molimauina i le Faaaliga 15:3-4, le pese ona o le Paia ma le amiotonu faaaliga o Le Atua. O le talitonu o tagata o Le Atua i Lona faamaoni i mea uma Na te faia, o se manatu taua tele lea e fusia faatasi ai le tele o aoaoga a le Tusi Paia.

E iai taimi tatou te masalo ai pe tonu Le Atua i mea Na Te faia ia i tatou. Ua faaaliga mai iinei le folafolaga e iai le aso e manino ai mea uma. A tatou vaaia le tala atoa, ona tatou malamalama ai lea sa iai lava Le Atua ma Lana ta'ita'iga i o tatou olaga, e ui lava ina tatou le vaaia o Ia.

I lenei olaga, tatou ola i le faatuatua ia Ana folafolaga.

O Le Falefetafa'i O Le Feagaiga

O loo faatomua mai e le Faaaliga 15:5-8, se vaaiga fou. O le vaaiga o le Malumalu pe o le Falefetafa'i i le lagi.

I le Faaaliga 11:19, sa ta'ua ai le Ato Laau o le Feagaiga i le malumalu. A o nei, ua vaaia e Ioane, ***“le malumalu o i le falefetafa'i o iai le mau.”*** O le Esoto 34:28-29, tatou te maua ai faaupuga eseese: ***“Upu o le feagaiga e sefulu upu,” “Feagaiga” o “Papa Maa e lua o le tulafono,”*** e faatatau uma ia faaupuga i, ***“Tulafono e Sefulu.”***

A o vaaia e Ioane le Malumalu o iai le Mau, na ia faailoa mai ai o le Malumalu o le Mau, o loo teu ai le Tulafono e Sefulu a Le Atua.

Ua tatou manino i vaaiga ua mavae atu, o le taua mulimuli, o le taua e aafia ai tapua'iga, o ifoga, ae maise tulafono muamua e 4. O tulafono ia e manino ai le fesili, ***“O ai Le ifo iai? E faapefea ona ifo? O le a le taimi o ifoga?”*** E le se salutafono a Ioane, ae na ia vaaia le taua tele o le usitaia o tulafono a Le Atua.

O Tulafono e Sefulu, o le molimau lea i le paia o le amio a Le Atua ma Lona faamaoni i mea uma Na Te faia i Lana Foafoaga. E leai se tasi fiafia e tusa ma lo tatou olioli pe a tatou tali atu i Le Atua Foafoa, e ala i le tapua'i ia te Ia e tusa ai ma Lona finagalo.

O Le Faamasinoga a Le Atua e Fea ma Faamaoni

I le Faaaliga 15:6, o loo vaaia ai mala mai le falefetafa'i o le mau, o le nofoaga o le alofa tunoa ma le agalelei o Le Atua. O le nofoaga foi o le faamasinoga o i latou e teena le Tala Lelei ma Tulafono a Le Atua. Ua faailoa mai foi le mafuaaga o le toasa tele o Le Atua: ***“Aua na latou faamaligiina toto o tagata paia ma perofeta”*** (Faaaliga 16:6).

O le Faaaliga 15:7, e foliga agelu ia Keriso i le Faaaliga 1. E ta'u mai ai, latou te o mai ma le pule atoatoa na tuuina atu e Keriso ia te i latou.

O le asu mai le mamalu ma le mana o Le Atua ua faatumulia ai le malumalu (f8). Ua le mafai nei ona toe ulufale se tasi i totonu o le malumalu se'ia mavae mala. O le ata lenei o le falefetafai i le toafa

(Esoto 40:34-35), ma le faapaiaga o le malumalu o Solomona (iTupu 8:10-11).

O se tasi lea o auala e ta'u mai ai ua mae'a le galuega faufautua i le taimi o le liligiina mai o mala e 7. O le taimi lenei, o le a fesaga'i ai i latou na teena le tala lelei ma le malosi atoatoa o le toasa o Le Atua, ua le o toe filogia i Lona agalelei.

“E le mafai foi e se tasi ona ulu atu i le malumalu.” O le tasi lea o auala e faamalamalamaina ai le tapunia o le faitotoa o avanoa. O mala e 7, o le toasa lea o Le Atua o le a liligiina ifo i le taimi o le iliina o le pu lona mulimuli.

Ua tapunia nei e Le Atua le Faitotoa o Avanoa.

O le Faatusatusaga o Iligapu ma Mala

E iai le fesootaiga vavalalata o iliga pu e 7 ma mala e 7: E aafia uma le lalolagi, sami, vaitafe, la, pouliuli, Eufirate i Pu ma Mala. Ae iai foi eseese taui e tataua ona maitauina:

- O loo faia pea le galuega o le fautua i le taimi o iligapu, ma o loo talaiina pea le tala elei (Faaaliga 8:2-5).
- Ua le o toe iai se fautuaga ma se avanoa mo se faamagaloga i le taimi o mala (Faaaliga 15:8).
- E na o se vaega o le lalolagi e aafia i iligapu; a o mala e aafia ai le lalolagi atoa.

- E aofia le talaaga atoa o le Ekalesia i iligapu; o mala e na o le taimi Tuaoi tonu ma le toe afio mai o Iesu

E liligiina mai mala i le taimi o le iliina o le pu mulimuli. E pei lava ona taamilo faa 6 Isaraelu i le aai o Ieriko, ae o le aso lona 7 na iliina ai loa pu ma solo ai pa o le aai (Iosua 6). **O le iliina o le pu lona 7, ma mala, o vaega uma ia o le lepetia o lenei lalolagi.**

O le a pauu mala tetele mulimuli i luga o i latou e teena Le Atua ma Ona tagata. A e pei lava o Isaraelu o Aikupito, e faapena foi ona lavea'iina e Le Atua Ona tagata.

E auina mai e Le Atua faamaufaailoga ma iligapu faa lapata'iga a o le'i oo mai mala. O se tasi lea o Ana olega o le alofa ia i latou uma e le'i salamo ina ia latou iloa le mata'utia o le tau i le tetee. E le gata i lea, e faia foi ma faamalosi'aga i le au faatuatua ia tumau.

O Mala Muamua e 5 (Faaal. 16:1-11)

O loo faaaogaina ipu auro 7, e liligiina ifo ai mala. Sa faaaogaina ipu i le malumalu mo taulaga ma mea manogi. O ipu nei o le malumalu sa faaaogaina e faia ai taulaga i Le Atua. O le Faaaliga 8:3-5, tatou te molimauina ai le tumu o nei ipu i mea manogi, o tatalo ia a le au paia. A o lenei ua faaaogaina ipu o se mea faigaluega e faatafunaina ai le lalolagi!

O le mafuaaga o le faatafunaina o le lalolagi i le toasa tele o Le Atua, ona o tatalo a tagata o Le Atua.

O le fesili taua e masani ona fesili ai tagata: **“O ni mala totino (literal) ea nei mala?”**

O se fesili faigata lenei. E tumu le tusi o Faaaliga i gagana faaata ma faatusa. Peitai, afai e le ni mala moni, e faapefea ona aafia ai i latou o liligiina ifo iai nei mala e pei ona molimau mai le Faaaliga 16:9, *“Ona latou faifai lea i Le Atua,”* ona ua, *“mu tagata i le mu tele?”*

E ui i lea, o le gagana faaaogaina i le mala lona 6, o le gagana faatusa. O loo faaataina mai i lea gagana le tulaga o iai le lalolagi a o aga'i i le Taua i Amaketo. E faapefea la isi mala? E lelei lo tatou faatali lava teisi.

E foliga mai e tataua ona iai se aafiaga totino o mala. E mafai ona faaaogaina le gagana faafaatusa e faamalamalamaina ai ni mea totino. E iai le sootaga o mala nei ma mala i Aikupito. O mala o Aikupito, o mala totino moni lava na oo i tagata.

O mala na liligiina ifo i tagata Aikupito, na ta'u atu ai ia i latou e leai se malosi i o latou atua pe a faafeagai ma Le Atua Foafoa.

E mafai foi ona avea lenei ata pe o lenei faatusa o mala e 7, o se auala e faailoa ai i le lalolagi le taufaasese a le nofo-tolu-pepelo (false trinity)—o le tarako, le manu fe'ai mai le sami, ma le manu fea'i mai le fanua—pe a fesaga'i ma Le Atua Foafoa.

E oo mai i le taimi lea, o loo faia e le nofo-tolu-pepelo o vavega e faasese ai le lalolagi. A ua fesaga'i nei ma Le Atua Foafoa. E pei lava o Aikupito, ua toe faamaonia foi le e leai so latou malosi pe a fesaga'i ma Le Atua Foafoa. Ona matua lilivau ai lea o i latou ua faaseseina e

le nofo-tolu-pepelo. Ona latou liliu atu ai lea ua 'aina, saeia, ma susunuina le na faaseseina i latou (Faaaliga 17:16).

E iai i latou e manatu, o mala nei, o mala lava faa natura e tutupu faasolosolo mai i le tala faasolopito o le lalolagi. E le talafeagai lea manatu ona o le a liligiina ifo nei mala ia Papelonía i le i'uga, ina ua tapunia le faitotoa o avanoa.

Ua totogiina nei e Le Atua le leaga ma sauaga na faia e Papelonía i Ona tagata (Faaaliga 18:4-8).

Mala Muamua—Papala Tiga (Faaaliga 16:1-2)

O le papala aati e oo ia i latou uma e iai le faailoga a le manu fe'ai. O le gagana foi lea na faaaogaina i papala mai fulafula na liligi ifo ia Aikupito (Esoto 9:10-11). E faapena foi papala o Iopu (Iopu 2:7). O papala o se tasi lea o mala o le feagaiga pe a solia (Teut. 28:27)

Mala Lona 2—Liu Toto le Sami (f3).

Ua liligi ifo e le agelu lona lua o mala i le sami, ona liu toto ai lea o le sami pei se toto o se tagata oti. Ona mamate ai lea o mea ola uma o le sami.

O le pu lona lua, na liu toto ai le tasi-vae-tolu o le sami, mamate ai le tasi-vae-tolu o mea ola o le sami (Faaaliga 8:8-9).

O iligapu, o le faailo lea o le faamasinoga. Ua na o se vaega na aafia ai i lea taimi. A o lenei ua liligiina ifo le atoatoa o le toasa le filogia o o Le Atua.

Mala Lona 3—Liu Toto Vaitafe ma Vaipuna (f4)

O le pu lona 3, na oona ma onana ai tagata e toatele. A o lenei ua liu toto vai uma, a e le o ta'ua mai ai se oti.

O le mafuaaga o nei mala o loo ta'ua i le Faaaliga 16:5-7, "***Aua na latou faamaligiina toto o tagata paia ma perofeta.***" O lenei la, ua tuuina atu ia te i latou e Le Atua le toto o tagata e feinu ai!

Ona tali mai ai lea o le fata faitaulaga, "***E moni, Le Alii e, Le Atua e Ona le malosi uma lava***" (f7). E foliga mai le fata faitaulaga lenei o le fata faitaulaga o taulaga mu o loo ta'ua i le faamaufaaailoga lona 5. O loo vaaia ai tagata o Le Atua o alalaga mai i lalo o le fata faitaulaga, ina ia faamasinoina e Le Atua i latou o nonofo i le lalolagi, se'ia tauia o latou toto.

Mala Lona 4—Ua Susunu Tagata e le La (f8-9)

Na aafia le la i le pu lona 4, ona oo ai lea o le pogisa tele (Faaaliga 8:12). Ae tuufaafegagai le i'uga o le mala e 4, ma le pouliuli o le pu lona 4—ua matua faateleina ai le vela o le la, ua susunuina ai tagata.

E uigaese le tulaga e oo iai tagata ona o le mala lenei. E foliga mai ua iloa e tagata o loo latou faasagatau i Le Atua. Ona le salamo lea, a ua faifai i le suafa o Le Atua. O lea ua latou auaumea faatasi ai ma le manu fe'ai i le faifai i Le Atua (Faaaliga 13:6).

E iai i latou e manatu e mafai ona liliu atu i Le Atua i soo se taimi lava e malie iai. A ua faailoa mai e nei mau le valea tele o lea manatu. Ua latou faia filifiliga, ma ua leai se avanoa e toe liliu ai. **O lo tatou**

tagata i le aso, o lo tatou tagata lava lea a taeao—a o le a sili atu. E matua taua lo tatou liliu nei ma loto ma agaga atoatoa ia Iesu Keriso i le aso.

I le maliliu o Molimau e Toalua, na iai i latou na salamo (Faaaliga 11:13), ma liliu i Le Atua. O le tala'iina o le fe'au a le agelu muamua (Faaaliga 14:7), na vivii ai nisi i Le Atua o le lagi. A o le toatele e le'i liliu—a o nei la, ua le toe mafai ona toe liliu se tasi.

Pe a Tapunia le Faitotoa o Avanoa.

Aisea e liligiina ifo ai nei mala pe afai ua tapunia le faitotoa o avanoa? E taua tele le tali.

Ua tala'iina le tala lelei i le lalolagi e pei ona faamamafaina e le fe'au a le agelu muamua. E faaauau lenei tala'iga i le taimi o iliga pu muamua e 6. O iliga pu nei, o se vaega lea o le faamasinoga pe o se vaega o le toasa tele o Le Atua i le i'uga, ina ia lagona ai e tagata le i'uvale o le ala o latou savalia ma liliu ese mai ai (Faaaliga 11:13). E ui lava i lea, ae toatele pea i latou e teena lea valaau a Le Atua. O i latou ia e lagolagoina le faasese a le nofo-tolu-pepelo, ona faailogaina ai lea o i latou i le faailoga a le manu fe'ai.

Ua faaseseina ma faailogaina nisi i o latou muaulu. A o nisi ua mulimuli atu lava i le motu o tagata. Ona avea uma ai lea o i latou o le au tau mulimuli e faasagatau i Le Atua ma Ona tagata. Ua latou faia le filifiliga, ma latou sauaina tagata o Le Atua. O nisi, ua oo lava ina latou fasiotia tagata o Le Atua (Faaaliga 16:6; 20:4).

O le taimi lea, o le a vaaia ai nisi o i latou e pei lava o le au Faresaio i le taimi o Keriso. **Latou te faaaogaina vavega ma faailoga e tosina ai tagata e auai i faiga a Papelonia.** Ae o ese ma faataumamao ai lava soo o le Tamai Mamoe mai ia uiga uma.

O le Vanu Tele

Ua filifili le tasi vaega o tagata e mulimuli atu i le Tamai Mamoe tusa lava pe o le a le tau. Ua latou anaana ma usita'i atu i fe'au a agelu e toatolu. Ua latou taliaina le valaau o le faamagaloga e ala ia Iesu, ma latou anaana ai i le feagaiga o Tulafono e Sefulu lava ia (Faaaliga 12:17; 14:12). E oo mai faafitauli ma mala mai i le lalolagi i lea taimi, ae atili ai lo latou faalagolago i le ta'ita'iga a Le Atua latou te malu ai.

Ae iai i latou ua filifili e teena le fe'au a agelu e toatolu. Ua latou filifili e mulimuli atu i le nofo-tolu-pepelo. O le afi mai le lagi a le nofo-tolu-pepelo, avea lea ma faaseseega malosia tele. Na latou taumafai e faamalosia le isi to'agalauapi ia au faatasi ma i latou. O lo latou faia o ia uiga, o lo latou fausia lava lea o le faatusa o le manu fe'ai—e pei lava ona galue le manu fe'ai mai augatupulaga anamua. **O iligapu, sa tatau ona avea lea ma lapata'iga, o loo latou faasagatau atu i Le Atua,** a ua latou taofimamau lava ia latou filifiliga ua le mafai ai ona toe liua.

O le taimi lava e mae'a ai filifiliga a le tagata i le itu e au iai, ona tapunia loa lea e Le Atua le faitotoa o avanoa. O le liligiina ifo o mala i le taimi lea, o le a atili ai ona loloto lenei vanu tele. Ona saunia ai lea o itu nei e lua mo le seleselega. O le seleselega saito a Iesu pe a

afio mai e ave i latou nei i le aiga moni. A o le seleslega vine ina ia solia pe susunuina pe a toe afio mai Iesu.

O Loto Maaa

O loto maaa o le au amioleaga i le taimi lea, o lo latou naunau e tetee atu i Le Atua (Faaaliga 16:10-11), e faailoa mai ai le pagatia tele o le tulaga ua oo iai.

E leai se mea e toe mafaia e Le Atua e liliu i latou nei. **Ua latou matua faamaaina lava o latou loto. Ua le mafai ai ona toe liua i latou.** O le mafuaaga lea e tapunia ai e Le Atua le faitotoa o avanoa—e leai se aoga e toe tala’iina ai ia i latou le tala lelei. E ui i tiga (Faaaliga 16:11), a e latou te le liliu lava pe salamo i mea na latou faia.

A o oo mai mala, a ua atili ai ona liliu atu le isi vaega i Le Atua mo Lana puipuiga. Ua uma ona Ia faamaufaailogaina i latou ma ua mautu lo latou puipuiga. O i latou ia ua atagia mai ai le amio a Le Atua (Faaaliga 14:1).

A o i latou na liliu ese mai Le Atua, ua vaaia lo latou ita, lilivau, mafatia, ma latou fia faatama’ia ai o soo se mea. Ua atagia mai ia i latou le amio a le tarako e pei ona faaataina mai i le faailoga a le manu fe’ai (Faaaliga 13:16).

O le Mala Lona 5—Pouliuli (fio-11)

Sa pule le manu fe’ai mai le fanua i le lalolagi. O lana pule e mai le manu fe’ai mai le sami lea. O ia pulega tuufaatasi, e mafai ona tosina ai le toatele e nonofo i le lalolagi i le itu a le tarako. Ona oo ifo ai lea i

le nofoalii o le manu fe’ai le pogisa matua tele. E talafegai lelei lenei mala ma le mala lona 9, na faapouliuligia atoa ai Aikupito.

Ua iloa nei e i latou na mulimuli atu i le nofo-tolu-pepelo, le matua leai o so latou malosi ona o le tetee i Le Atua Foafoa. Ua latou iloa foi e le mafai e le malosi o Papelonía ona lavea’iina i latou i o latou tiga ma mafatiaga ona i mala.

Ua matua lilivau lo latou ita ona ua faaseseina i latou e Papelonía. Ona latou manatu ai lea e i’u atu lo latou ita i soo o Iesu. E iai i latou o le a fasiotia faa maturo **a o le’i tapunia le faitotoa o avanoa** (Faaaliga 16:6; 20:4). A tapunia loa le faitotoa o avanoa, ona **le toe iai lea o se leaga** e afaina ai e faatuatua ia Iesu. Ua malu nei i latou i le faamaufaailogaina o le puipuiga a Le Atua.

A o le a faateleina le pulega a temoni ia i latou ina ua latou iloa e leai so latou malosi e tau ai ma Le Atua Foafoa. E tutusa lelei lava lenei vaaiga ma le tulaga nai ai mala i Aikupito—sa atili ai le faamaaa o le loto o Farao i le faasolosolo mai o mala. Na manino lava Farao o loo tetee atu i Le Atua Foafoa, a e na le liua ai lava o ia.

O le Vaaiga i le Iuga o le Lalolagi

A o faaauau mala, a ua lalata mai foi le **Amaketo!** O le vaaiga lenei o le mala lona 6 (Faaaliga 16:12-16).

E maofa le lalolagi i le Amaketo. Ua tele ata tifaga, ma tusitusiga e faatatau i le Amaketo. A o le ogatotonu o le Amaketo, o le tala lelei lea. O le Faaaliga 16:15, o le lapata’iga soo o Iesu ia mataala ma tausi i o latou ofu:

“Amuia le mataala, ma tausi i ona ofu, ina ne’i savali o ia i le le lavalava, ne’i latou iloa atu foi lou masiasi.”

O le lapata’iga lenei i Kerisiano uma. A tauina lenei taua, ia le maamulu o latou ofu i le faatuatua ia Iesu Keriso.

Na tatou maitauina i la tatou ulua’i suesuega, a malamalama tonu le tusi o Faaaliga, ona faatuputeleina ai foi lea o lo tatou faatuatua ia Iesu.

E le’i tuuina mai e Le Atua lenei tusi o Faaaliga e na ona taliaina ai so tatou fia malamalama i le lumana’i. O lona uiga ma lona mafuaaga atoa, o le faaaliga mai lea o Iesu i se auala e faatuputeleina ai ma faamalosia o tatou faatuatua ia te Ia.

O le manatu taua lenei e tatau ona teulotoina a o tatou suesueina le Amaketo i la tatou suesuega o sosoo mai.